

山西通志

故成在太原府屬者。陽曲縣有三交城、虎北口、陽真壘、清泉寨、新城堡、永甯堡、生民堡、全民堡。太原縣有藍峪

凡峪、晉安寨、榆次縣有黃蛇嶺、洞過驛、長甯寨、太谷縣有蔣谷、咸陽谷、文水縣有洞柵口。在汾屬者、汾陽縣有黃櫃嶺、平

遙縣有晉同關、介休縣有閻子嶺、孝義縣有版谷關、白壁關、旁願谷、溫泉鎮。

黃蛇嶺在榆次縣北唐武德二年劉武周引突厥入寇軍於黃蛇嶺襲臨榆次即此 洞過水在崞南十五里光化五年

汴將氏叔琮等分道侵河東出石會關營於洞過驛 長甯寨崞東南二十五里後魏將李長甯討居六日長甯

壁 壁當是之唐之邑
長甯廢存

原书缺页

取三十七城四年初置太原郡榆次屬焉

史記正義云太原郡地即以上所取三十七城爲屬邑

漢承秦制榆次縣隸太原郡

晉置太原國榆次隸太原國分其東北地爲壽陽縣自晉東渡而太原雜入於劉石苻秦慕容氏改國爲郡縣之隸係如故

北魏太原郡榆次仍隸焉真君二年並省其地入於晉陽至景明元年復爲榆次縣

北齊改榆次置中都縣

按中都自戰國時已有之秦本紀伐趙取中都是也漢置中都縣高祖十一年立子恆爲代王都晉陽後復都中都地理釋名云因晉中行氏所都故稱中都中都與榆次地相出入蓋隋氏以前榆次境甚廣故漢析其南之半合陽邑平陶立中都縣而晉又分其東北餘地置壽陽若齊之中都則因北魏之舊而更擴其地故榆次城壽陽城平譚城並在其封內矣

隋開皇中復改北齊中都縣爲榆次縣隸太原郡又析餘地爲清源縣

唐隸太原府太原爲北京榆次爲畿縣又稱南趙

五代並如唐制

宋太平興國四年平北漢毀太原城徙并州治於榆次
五月更名榆次爲并州七年於陽曲縣之唐明鎮立
新州治而榆次復爲縣隸并州爲次畿

按是時潘美爲并帥奏乞復并州之舊乃徙州治
別建而以縣隸州如故

自舜肇十二州兩漢因之歷晉至北魏皆以州統

郡并州刺史治所則在太原

今太原縣

若太原郡雲中

郡代郡雁門郡五原郡等並并州刺史領之至隋

始盡改郡爲州由是州與郡同不復統領然太原仍稱并州下至唐宋皆然唐初置并州都督旣而陞太原爲北京而并州之名亦不廢故唐書宋史皆兩載其文如李勣爲并州都督而李光弼馬燧等則爲太原尹是也又宋韓琦滕宗諒馮京等傳或云知并州或云知太原府此蓋當時之制有如是者至宋徙并州治於榆次復徙建新并州於唐明鎮由是始爲今太原府而非漢以來并州刺史所治太原之舊矣

金太原府領縣十一榆次仍隸焉縣列太谷清源徐溝

之後

元隸太原路後改太原爲冀甯榆次列祁縣後

明隸太原府

國朝因之

以上建置

編戶卷一百八里今七十都

榆次之分野當天文畢昴間

太史公曰趙地畢昴之分野趙得趙國太原定襄雲中
五原上黨皆趙地也

春秋元命苞昴畢間爲天街散爲冀州流爲趙國

晉天文志太原入東井二十九度

唐書觜觿參伐實沈分也初畢十度中參七度終井十

二度其分野得太原

明一統志太原禹貢冀州之域天文參井分野

圖書編山西諸郡太原參井分野

錢志云昔人皆以榆次屬太原同爲參井之分野
夫星野諸家雜出不同由太史公元命苞之言則
榆次絕不在參井之分如晉書及諸志所云則榆
次又殊乖畢昴之次唯唐書謂初畢十度中參七
度終井十二度得太原則太原自爲參井分與榆
次分星而榆次爲昴畢之分皎然甚明榆次本大
梁之分無與實沈其分野在畢昴間得畢爲多也

又考星經占法云分野所係要當以其地之應占
變者爲準昔趙惠文王時月嚙畢而秦拔榆次唐
天寶末昂畢相鬪而安祿山將反遣驍騎十八人
入太原擒節度使楊光翹以去未幾使史思明圖
太原而攻榆次然則榆次之分野不屬參井豈不
曉然哉 以上星野

宋太宗初以榆次縣爲并州廣其封圻至四百餘里**金**
大定中以地廣民眾割其東三百戶入壽陽西四千
五百戶入平晉南三千七百五十戶入太谷西南六
百戶入徐溝西北八百戶入陽曲榆次所存尚三萬

二千六百餘戶

榆次縣東西廣八十五里南北袤一百一十五里東至
壽陽縣西落鎮界三十五里西少北至太原縣界
二十五里南抵東陽鎮至太谷縣界三十五里
北至陽曲縣界八十里東南抵霍城村至遼州和
順縣界九十六里西南抵永康鎮至徐溝縣界三
十五里東北抵什貼至壽陽縣界四十五里西
北抵西溝至陽曲縣界四十里自榆次縣治西北至
太原府治六十里由縣治東北一千一百里達於京
師以上疆域

縣之形勢遠以壽陽遼州和順爲屏蔽近與陽曲太原
太谷相襟帶升高以望連山拱峙乎東北二水流潤
以交縈自昔以來地多用武是以擅雄劇之稱爲都
邑之勝矣而堪輿之家以爲榆城中處兩河界分澗
河在北往往涸絕若洞渦合大小涂數水起自東南
歸流於汾其源不息從巽而坤有長養之象焉

以上形勝

考漢書地理志北魏地形志元和郡國志歷陳疆
宇瞭如指掌而於州邑則未暇覩縷榆自前明閣
司成輯志首列地理劉志錢志復申其說蓋以覘
政教非徒誇形勝也夫地廣民衆致治爲難蒞斯

土者將爲繭絲乎將爲保障乎視彼彈丸昔取爾堂
自不侔矣

榆次縣志卷之一

山川 橋梁衢路附

罕山 在縣北五十里自太行逶迤而來高出諸峯上
爲縣鎮山圖經謂之看山魏書地形志又名旱山蓋
罕看旱北方音同云爾每當雲氣蒸發不崇朝而雨
徧故邑人率以爲占其東北接壽陽境罕山引而西
少南爲陰山少東南爲冀家山

冀家山其勢縣延望若屏蔽爲罕山左翼西南五里爲
烏金山

烏金山去縣四十里林木叢蔚爲榆邑清涼勝境上建

水晶院中有龍池冬不冰夏不涸人傳文殊大士飲
獅於此鄉人當旱時於池禱龍輒得雨

紅沙山 在烏金山東南七里一名大洪山俗呼四凹
峭壁巉巖沙石多紅中有正壽寺四圍栝柏掩映冬
日愈青其旁清泉瀆出潺潺送響時有鳥聲相和

陰山 在罕山少西南形勢險峻上有深洞土寨羅列
爲先世屯兵之所其東南爲

先鋒山亦有壁壘遺址

犢牛山 在陰山西

老鴉山 在犢牛山西怪石峻嶒峯巒陡峻爲諸峯最

大方山 在老鴉山西南五里高數十仞四角隆起少西南爲

小方山

中林山 在大方山西南卧虎山西草塚山東去縣三十五里中揖羣峯松柏鬱茂四時望之皆浮青攢翠其上和合寺在焉

卧虎山形卑而險狀若虎伏史稱李克用與振武軍將戰於卧虎山兵敗而退其故處也

草塚山形墮而勢積如堆草狀劉志名草堆山

饅頭山麓平廣而頂尖削狀若牢丸故名

海螺山 在大峪口西北半里許上有洪聖寺

兔兒山 在卧虎山東南二里

五太山 在河口村西北二里下有五龍廟廟西爲五

龍河

殺熊嶺 在王胡鎮去縣不十里宋制置使种師中戰死其地明初嶺上林木猶多後剪伐童然改呼王胡嶺云

小五臺山 在縣東北二十餘里蘆山寺憑之內有文殊之跡九曜龍池兼有孔子像不知何人所營寺有古碑今多剝落

其東南之山絕遠者八縛嶺魏書地形志八賦嶺也距縣一百里山勢環帶縣延數里山之東南遼州和順縣其西北境則榆次矣八縛水出其下又東北大涂水出焉其西與八縛對者爲柏翳山其北十里爲曹家嶺

曹家嶺長亙十餘里上有鼉蓋趙朵諸寨古避兵處也西北爲

貓頭嶺明崇禎中知縣任濬勦土寇於此又西北爲漫天嶺三嶺相望勢俱險峻

神林嶺 在曹家嶺北去縣八十里雄偉兀立高出羣

木之縣志 卷一
山形勝爲東南之冠其地古叢林薄故陰寒積雪至夏不消嶺東接和順縣境

鷹山褚志謂去縣東南八十里小涂水出焉後不可考惟神林嶺北三里有山兀竦土人或稱雁山山後東爲雁溝屬和順西爲圍子溝溝水入大涂褚志謂鷹山者或即此歟其北三里爲盤腸嶺

盤腸嶺危峻難躋取徑紆曲如盤腸然故名

神山 在盤腸嶺東北三里其下溝水亦入大涂

柏翳山 在八縛嶺西八里四壁陡峻高數十仞蹊徑僅可容步亦名柏翳寨

三縣塔 在柏翳山少南其西南屬太谷東南屬和順

西北則屬榆次

帽帽山 在柏翳山西北又西北爲架嶺

架嶺嵐光霏結黛色參空備極秀偉之狀北爲青楊嶺
青楊嶺縣互十餘里在涂水之西土人又稱爲大西山
嶺其最高處也層巒起伏眾壑紆迴其上林木鬱茂
四時皆青與南北諸山有中處聯絡之勢

紅羊山 在青楊嶺少西北五里相傳牧者陷羊於穴
中覓得之則毛盡赤蓋硃砂洞也再往遂失其處上
有大尖小尖寨怪石巉巖天然壁壘爲昔人避兵所

杜家山 在紅羊山西南十里石梯嶺南大羅山東長互五里其東爲大塢峯金水河出焉

石梯嶺 在白田村東鑿石爲磴如梯然長十餘里

大羅山山勢平衍互五里西南屬太谷東北則屬榆次分水山 在白田村西一里盛夏雨集水自山而下東北入涂東南入金水河西入圪塢河

鳳頭腦 在段和莊北里許

魯仙山 在白田村北五里西南距大羅山十五里巒壑周圍危峯特峙東南望八縛神林諸嶺西北指寶峯鹿臺諸山俱朗若列眉上有古刹曰靈峯寺亦名

魯仙寺

麓臺山 在魯仙山西北二十里一曰鹿臺山亦名鹿
蹄山高數十仞山椒平衍魏書地形志榆次有鹿臺
山祠今無考土人稱山頭北三里爲麓臺村即麓臺
寨有智伯廟四面皆溝形勢扼要少東南爲寶峯山
寶峯山俗名浮圖山去麓臺五里蜿蜒偉特山半有寺
鐘樓高踞其巔下有龍池澄澈如玉其東五里爲神

頭山

神頭山相傳有智伯墓國人刻木爲首以葬故名與寶
峯山對峙

南北蘭交嶺東南距魯仙山西南距神頭山俱五里許
分峯屹立涂水經其中北蘭交之陽有石壙焉褚志
所謂蘭交古墓也

榆城坂去縣東南三十里在昔壁立數十仞旁徑險仄
輪蹶多摧宋賀方回過之有詩中爲榆城村高處有
榆城寺其地多柳邑中以榆城煙柳爲八景之一上
有土寨下有懸窰可避兵今坂雖蟠曲而漸就平夷
紫巖山 在什貼西北距縣六十里接壽陽境俗稱長
者頭相傳唐李通元著華嚴經論於此中有華嚴寺
其山松柏叢生遙望蔚秀蒜峪芹峪二水俱出其下

洞渦水源出樂平縣西四十里陡泉嶺嶺高半里許右
有二泉始可濫觴即洞渦水也水經注云洞渦水出
沾縣北山今樂平縣即漢沾縣也至嶺下諸水會集
泛濫成河西流十里至店上地又二十里至平定州
廣陽鎮稍西北經流松曲許莊凡二十四里至松塢
浮化水自平定西浮化山行至裴村合龍泉水凡二
十四里來注之又四里木瓜水自和順木瓜嶺經白
水寨馬坊合石猴嶺水凡七十五里來會之水經所
謂南谿水也復西流四里至李莊入壽陽南界又二
十四里至羊頭崖又十三里有冷泉寺寺西黑水自

壽陽西北七十里偕其縣西龍門水東北童子河東
壽水曲折行五十里來會之又西三里經盧家莊有
水自南來注之即蒲谷水也又西流六里至建公穴
穴大可三四畝水深不測相傳其中有怪物焉又西
行十八里至西落過大坂入榆次縣界稍西北行下
峪河入焉經東趙村石家坂河入焉入縣境西流凡
十三里至北合流村大涂水合小涂水來會之又西
五里源渦水行半里餘自北注之經縣東南又西南
流凡五十里由永康鎮過郝村入徐溝縣境

按水經注洞渦水過榆次縣南又西至晉陽縣南

西流入汾周秦以前止聞涂水白桑欽作水經洞
渦水始著焉然以魏書地形志論之凡五水合流
而過故謂之同過若大小涂則皆合於是以注汾
者也由斯言之洞渦宜居眾水之先矣

又魏地形志云五水合流同過然其所指惟四水
而缺其一若同過水出木瓜嶺一出沾嶺一出大
廉山一出原過祠下此四水其明稱者其一未言
者不知何水而大廉山今亦不知所在嘗試推之
其云出木瓜嶺者即今木瓜水出沾嶺者即今洞
渦水出原過祠下者即今源渦水至所謂出大廉

山者恐非二涂水別無以當之者今言大涂水皆云出八縛嶺然實在八縛東八縛之東山在古或名大廉而魏志因以稱之而大涂出其下則云一出大廉山也大涂小涂合洞渦木瓜源渦正得五水然大小涂二水共名其出未遠即已合流是二

涂水猶一水也志是以明稱五水而缺其一不復著使觀者自得之抑志云同過水出木瓜嶺是木瓜水本應稱同過水即源渦大小涂亦得兼以同過名之矣又按水經注作洞渦魏志作同過他書作同戈宋史作洞鍋宋史紀事又作銅鍋凡一水

而志異者五

大涂水出八縛嶺湖海坪西流二里經後溝又五里至
霍城村八縛水自東南來注之又西北流四十里至
石槽頭小涂水自東北行三十里來會挾小涂合流
不十里經蘭交有小泉水出自南山下來注入焉又
西北行經合流村環中都故城與洞渦會

小涂水褚志謂發源縣東南八十里鷹山今縣人無識
鷹山者考水入大涂者有二一出雁山圍子溝十五
里至故莊又十里至王家莊又十里至石槽頭南入
大涂水一出神山下孤神頭西流十里經千佛寺橋

又西十二里經張家莊又五里經原家峪又西三里至石槽頭北亦入大涂水雁山神山距縣俱八十里許褚志所指小涂二水未知孰是姑並存之以備考按地形志榆次有長甯水西北合同過縣志郡志皆逸其名殆不復知有是水矣以今考之當即大小涂水是夫世代推移山川土地之名亦多逐時變若夫邾子之國後乃訛鄒濞沱之水晉爲惡池列子五行更號太行禹貢滄浪改作夏水其由來久矣

八縛水出八縛嶺西北行十里至霍城村合於大涂

牛坑水出縣東南三十里紫坑溝溝起張平村距村二里許名茫茫壑壑東水東流由藺交以入涂其西則西流成溝由張平五里至下黃彩又五里至橋頭村又十里至紫坑村南泉水出焉褚志謂牛坑水者在此又里許至季藤又五里至藥村北又五里達西塢溝泉水混混即劉公續志所載西塢溝水者也流至西塢經莊子南北要郭村入於洞渦

杜堡溝水溝起縣東南上黃彩村西少北十里至楊壁又十里穿福堂東祁間又五里至杜堡即劉公續志所謂杜堡溝水也西北五里至楊梁又十里至雙村

亦名牛耕水纔爲南北二渠溝水自北渠西行少北復西經南要修文村地凡十里入洞渦

源渦水一出村東卧羊溝一出施霖洞一出永濟橋北一出甯氏魚池天寒不冰泉側草木冬榮名爲温泉唐貞觀中邑令孫湛引以灌田南行半里許入洞渦盛夏之時荷花盛開稻田綠滿古來名人往往遊憩於斯觴詠於斯亦勝境也

按源渦水乃原過水之訛水經注洞渦又西與原過水合水西阜上原過祠棟宇雖淪叢木猶茂故水取名焉今其處有龍祠蓋原過祠當北魏時已

廢涼過係趙襄子臣見史記趙世家

寒泉水出縣東井峪村龍祠下行十餘里經中郝西郝間注洞渦

北合流水出村東龍祠下南行注洞渦

東趙河出東趙村西北石家坂經小五臺南入洞渦

下峪河源發十里溝經辛置東河後溝下峪諸村入洞渦下峪河至後溝縣東北四十里柏林頭大佛溝水來合之又有李方水出李方村北神祠下每水漲泉湧流入下峪河下峪挾之同入焉

金水河源出縣東南杜家山大塢莊蜿蜒而西經西河

莊而南五里入太谷縣北郊村至溫莊村有水出自太谷縣西石土村經蒲城村西南十里至溫莊與杜家山水合復有水出太谷梁平村流經榆次縣朱村之南西行十里復入太谷東賈村與杜家山石土二水合皆稱金水河河流由東賈經任村郭訓村西南十餘里至縣之東陽鎮漸向西北行東陽及西陽諸村連纏爲渠引以灌田

圪塨河起縣東南六十里西窪村西二里許西行經子中平歷麻地溝金寨十五里至施家橋劉志所稱華豹溝也復西行經福堂村又西五里是爲圪塨河

溝又西至張胡村南行入太谷縣大郭西卜等村復西行入縣境縣之魏岳聖許等村當其下流引以爲渠資灌溉焉

澗河 在縣北十五里源出壽陽縣李家山西行穿山

谷出至胡家巖下股派歧出南流抵郭家溝入榆次縣境經蒜峪村蒜峪水合芹峪水入焉又南蘇河水入焉又少南折西行經左付村後溝水入焉又西行鞋底嶺水入焉又委蛇西南行經霈霖村田家莊諸村而西經神堂溝白龍河水入焉又西經蘇村峪頭村聶店稍南折鳴謙南又西行至秋村鳴李村東北

而清水河自北來入焉凡澗河入榆次折行七十餘里入於太原自太原境西行二十餘里經東溫莊小店鎮北歸汾河

按澗河在宋時縣令桑安世引以灌田今河水下流多涸必霖雨大集山水漲發河流始盛能達於汾不然亦不能入汾也其河流或經年不下者有之甚或數年不下者有之

清水河一名寺峪河出城北五十里罕山下西南行歷東溝平地泉大峪口小峪口諸村俱穿山谷間諸溝霖水以次畢注而清水則至大峪口南伏流至鳴謙

驛東而伏流復出里人疏爲二渠抵橋下其水嚴冬不冰有草蒼翠開小金花水西南行經至村凡三十里入於澗河

按明志稱清水河源出孟家井

芹峪水出紫巖山東南三里土人稱爲蔓菁溝西南流五里許至南山灘合蒜峪水入澗河

蒜峪水出紫巖山南二里流里許至南山灘合芹峪水西流五里入澗河

白龍河源出縣東北二十五里龍白村龍白溝西流合密頭溝水入澗河

蘇河水源出縣北四十里龍池頭西流七里至高壁村
北入澗河

後溝水出烏金紅砂冀家山諸溝之水至後溝合爲後
溝水南流入澗河

鞋底嶺水出烏金山南鞋底嶺溝南流入澗河

東溝河即褚志所謂沙河也出中林山下合世佛溝羊
溝龍池溝諸水流至鳴謙驛西七里故又稱七里河
西南流入太原地

磚井河草垛饅頭山下諸溝之水至劉家嘴眾派匯合
南流經土地坡又西南入河口至磚井村穿洪佛寺

前西南流入太原地

五龍河出五太山過甄井村西西南流入太原地

黃龍港 在縣東北半里許本漢唐故道歲久霖潦畢會疏爲港

以上縣東北諸水清水河至鞋底嶺水皆澗河所渠併惟東溝甄井五龍諸河山水漲發下流散溢入地皆不與澗河通

縣之水不一其大惟洞渦澗河二者以爲經眾水緯焉眉目朗設勝披縣圖矣昔僧一行論中國有山河兩戒後鄭君談禹貢亦表川瀆四際以言九

州一縣方之何弗如是故雖百里中而洞渦澗河
猶南北條矣

橋梁衢路附

什貼土橋 在縣東北四十里初建三義廟南明萬曆
三十六年知縣王應楫改建廟北鄉貢王策記其事
地當孔道輪蹄雜沓里人不時修舉 國朝嘉慶二
十五年積潦衝決以致大圯武舉孫綱孫雲漢千總
田霍等經理重修薦舉孝廉孫縉爲之記

流村石橋 在縣北二十里主事張國儒記云地屬往
來通衢歲當夏秋淫雨洪濤衝破毀齧深窪滄險人

不可行壽官王經學乃建石橋知縣張鶴騰以俸金
助工始於明萬曆二十七年八月成於明年三月上
下悉砌石闊一丈七尺長二丈六尺高與闊等後霖
潦傾圮 國朝雍正二年邑令張孫鋆重建乾隆三
年至道光十四年復修

聶村石橋 在妙智寺前建自前明年月無考 國朝
康熙五十一年水決橋毀鄉人捐資募工取村南廢
橋遺石修補完固車徒稱便

龍白村石橋 在村東明萬曆十一年建 國朝道光
十五年重修

青龍橋 在西付村土橋也初名灞陵 國朝康熙年

知縣劉星重修更名青龍以爲邑中科第風水之利而行者亦便邑諸生張際昌勒碑橋左嘉慶五年復修貢生張琴作記道光八年村人以橋旁洩水渠淺狹易壞擴之俾水盡入渠復高其橋脊以期永固

源渦橋 螿石爲之亦名永濟橋始建不及考明正德中里人原耀等萬曆中桂廷軌等 國朝順治三年甯

琇相繼修

永濟橋 在慶城村南五里明宏治七年民崔良貫等建 國朝雍正八年圯里民李長奎等修

下黃彩橋邑人孫璵記云村西有礮深百尺舊架木爲橋以通行者然山水時發木漂而人多傷於是里人趙恭修之架大木實以堅土明正德五年橋成勢甚完固萬厯中重修知縣徐守謙刻石紀事 國朝咸豐十一年里人王象輅等復修

紫坑溝橋 在村東五里劉志謂天然石洞便民往來康熙四年里人趙光俊等修今圯

雙村石橋 在縣南十八里牛耕水漲不便往來乾隆九年里人募眾爲梁遂無病涉之患

信修橋 在雙村北一里跨牛坑水甃石爲之雍正四

年里人公建

千佛寺橋 在孤神頭西十里千佛寺前小涂水經其下明正德七年里人劉碧等建

坑東土橋 在縣東南五十里坑東村雍正五年築

許曲土橋 在縣東南三十五里許曲村乾隆七年築
木瓜橋亦土橋也 在白田村西北三里許溝中產木

瓜樹故名康熙二十四年村人劉化龍等築

施家橋 在縣東南五十里時家莊之西里許亦土橋
也不知何時築

雙龍橋 在杜堡大伽南二村中間二村隔一深溝往

來未便咸豐二年各輸資財中建一橋顏曰雙龍

洞渦橋

長甯橋

在源渦東二里許爲遼和通衢順治七年知

縣楊三知督任達等重修生員劉學益記雍正十年
李通等重修

東郝橋

在縣東南五里乾隆十三年重修里人刻石

記其事

中郝橋

在縣東南五里雍正九年郝佩等重修

西郝橋

在縣東南五里

郭村橋

在縣南五里明嘉靖二年村人郭思州等建

國朝雍正元年重修道光年里人復修

修文橋 在縣南十五里明嘉靖四年諸生張哲記云
昔有司於農隙之候督民夫架橋以備往來然率皆
逋慢故蹤跡徒存病涉猶是有田氏者集鄉眾建設
板橋材質堅樸輪蹠雜沓坦然由之

以上六橋俱爲病涉洞濶而設用土木浮架至冬
而建春融而撤先王除道成梁之政猶可想見云

石梯嶺路 在縣東南六十餘里西起白田村逾段和

坡東訖溝口山徑崎嶇迤邐十五餘里爲遠和路明
萬曆三十五年西窪村人李才元等闢爲坦途往來

稱便。國朝雍正九年，仁烏村人劉學舜等重修。

神林嶺路 在縣東南七十里，西起溝口，經龍科村，至神林嶺，崇崇不一，約十五里許，爲和順路。亦明萬曆中李才元等修。國朝雍正九年劉學舜等重修。

榆次縣志卷之二

城池 驛城堡寨附

榆次之城戰國時已有之省志謂城自漢築蓋未考耳然自漢以來營立廢徙遠不可稽今城之建自隋始隋文帝開皇初改北齊中都縣仍爲榆次縣乃徙縣於漢故城東北隅更爲新城則今縣城所由始也其初土城周五里高三丈基廣四丈上廣二丈池闊與高等深半之爲門三上建樓櫓歷唐宋元史思明僕固瑒李克用及女真蒙古攻圍者數然舊制具存

明景泰元年修築周五里加擴三十步高與舊城等池

深入尺仍爲三門東曰迎曦南曰觀瀾北曰望嶽

成化十九年知縣趙縉增築二十三年知縣梁琮重修始甃以甃石鐵裹其門於沿池堤上植柳以護之

嘉靖二十年俺答入寇叅政王儀檄知縣李鵬重葺鵬與邑人致仕知府寇天與董其事閱數月工竣視舊城增高五尺廣一尺撤土陴悉易以甃增置敵臺二十角樓四警鋪十有六池外復列垣爲蔽二十五年城南樓燬於火知縣俞鸞毀淫祠撤其材以重建焉仍新其三門視舊城更增堅壯

隆慶元年知縣董三遷重修增置敵樓一十有六警鋪

十有二三門各建樓於上

萬曆三十二年知縣史記事開城西門記事以三十一年來知縣事謂居西者農作遼遠風氣障抑乃復開西門築甕城樓與三門等名其門曰帶汾甕城顏曰來鳳後改爲鳳朝三十三年知縣王應楫因史記事闢西門繼成其役額城上之樓曰夕錢先是門闕而大道未通應楫捐金易民宅爲廣衢闔閭洞達至今便之應楫自有記

按張國儒史記事生祠記縣有西門虞虜患塞久矣侯因士民請役興而民不擾築甕城城門南向

以迓鳳山之秀上建樓七楹塞者復通往來甚便而褚志謂城始隋築其門三府志稱景泰元年修城其門亦三則似舊止三門但不知國儒何所據而云然也記載闕如未由訂正亦信以傳信疑以傳疑而已

天啓三年知縣胡權重修邑人給事中張國儒爲碑國儒記云匠役工費不煩都里權捐三百金以給之使主簿李復允司其事復允明堪輿術以城東南隅爲文峰特建一樓置巨鐘於上擊聲遠播爲邑中科第風水資

崇禎十三年知縣韓如愈重修各門城樓

國朝順治六年城東樓災知縣楊三知重修故明御史張養爲碑

康熙二十二年雷雨壞東城數十丈知縣劉星修葺四十年知縣王亦宣修東門甕城六丈

雍正六年知縣鄒雙修城樓與角樓

乾隆十四年知縣錢之青修西城壞牆四丈三尺有奇嘉慶十九年知縣楊棟秀以修文廟餘費補修南城垣十數丈

道光元年縣令顧公麟趾周垣補修並重新各門譙樓

與四隅戍樓又於望捷樓之東建一鐘室工未竣顧以告養去後任呂錫齡踵成之三年始畢至今完固如初

咸豐三年粵匪竄至平陽縣令陳公曜圖以城東南西南三門各築城以連可蟻附而上乃各增高八尺

錢志載縣南門濠已淤爲平壤民耕之惟東西北三門隍帶其間加淺狹矣今距錢公修志時百十餘年南門濠雖爲平壤而形跡尙存若加挑濬與東西北三面胥可復初

南關城舊爲土城築於明嘉靖二十一年周五百四十七丈高一丈九尺廣一丈二尺池闊二丈深丈餘先是俺答至城下大掠十日關民數千家半被焚戮上司憫之檄知縣李鵬創建土城三面與大城聯絡以資保障四十一年蕭大亨爲令以土築低矮不足資捍禦欲甃以甃因遷官不果至萬曆二十一年知縣徐守謙恐城易圯請於上憲時大亨爲督府檄令甃甃先增高土城未幾徐調去後任張鶴騰繼之悉易以甃周六百五十三丈高三丈基闊二丈五尺上闊一丈八尺置敵臺十有二高與城等池外列垣高五

尺爲門三建樓於上扁其南曰萬春左曰東作右曰西成

按城關之甃甃始於蕭而成於徐與張昔之爲令者爲民任事經畫精詳不憚勞瘁有如此觀後褚鉄碑記與史記事所撰蕭大亨生祠記其巔末益悉矣

褚鉄碑記云徐君宰縣事議以榆邑去邊塞不遠關城與縣城連若關城破縣城不能獨存然以一關之故而勞一縣有所不忍縣有民壯四百八十三名每名工食銀六兩二錢半赴邊修守半留縣

歇役若以歇班工食扣留修理歇役暫令歸農則
三歲可得銀二千六百有奇若以一千三百兩買
甑以二百三十兩買灰以七十八兩買石以四百
六十兩給匠役搬運工食約用夫一千餘名車三
千餘兩牛取諸有力之家以三十丁朋當一名則
用人力歲不過一日而闕城可完遂委縣丞張之
雍等先增高土城功未完而調去張君鶴騰繼之
張君見邊方多事警報日聞三年成城恐不及待
查得庫儲保德倉本色餘銀若權借七百餘兩豫
備甑石俟扣民壯工食補還則一年可完二年之

功於官無損於事有濟乃請於上官許之復委縣丞趙啓後董焉不及二年工竣

史記事蕭大亨南關生祠記云榆次南關之城土築而矮不足捍禦蕭公每欲甃甃以遷官不果及公節鎮雁門制閩雲朔免榆次戍邊之資僦治材物復免榆次士卒之戍邊者使襄其役於是崇墉列堞邑人倚爲長城

國朝康熙二十二年地震壞雉堞知縣劉星葺之四十年西面圯堞口四十丈餘知縣王亦宣修之雍正十一年城壞知縣石鑑重修至乾隆十三年知縣錢之青

復修西牆垣十二丈六尺今東西二面各有殘缺南面剝落更甚昔人謂涓滴不治潰爲江河及時修整曷可忽諸

驛城堡寨附

山西通志二十四堡寨有在賈寨在縣井後王明里今設驛是什貼堡係与此同

鳴謙驛城 在縣北二十里明天順初驛丞李昶所創建至嘉靖辛丑八月北寇奄至居人徙離殆盡於是義民李時仁以告主簿梁柱柱與知縣李鵬請於撫按更築之即使時仁主其事月餘訖功四周屹然城周三里疏故池引流泉以繞其外今多殘缺

郭家堡 在縣西門外五里周三里許東西有門嘉靖

二十二年民郭廣等所築今間有殘缺

使趙南堡 在縣西北八里周九十丈外爲馳道環甃

以甃而鐵其門南北爲樓四隅皆有鋪舍嘉靖二十一年居人閻梅等捐金築之萬曆二十六年民康廷舜等重修今尚完

使趙北堡 在南堡稍北周一百二十丈嘉靖二十年築明年北寇入人民依堡獲全者千餘家 國朝康熙中修之雍正十年復修今尚存

源渦堡 在縣東八里周一百十丈嘉靖二十一年築萬曆二十八年修今存

東陽堡 在縣南三十里周七百五十丈西南北有門
上各建樓爲警鋪嘉靖二十一年築 國朝咸豐三
年補修

什貼堡 在縣北四十里周一百五十丈今尚存

上營村堡 在縣西二十里周一百五十丈明嘉靖二
十七年築今存

懷仁堡 在縣西南十五里周一百八十丈

馬村堡 在縣西南二十里周一百六十五丈明嘉靖時
北虜深入居人依此得免鋒鏑

長壽堡 在縣南十八里周一百八丈

張慶堡

在縣西南二十里周四百丈

永康堡

在縣西南三十里周四百丈

開白堡

在縣南二十里周一百四十丈

胡喬堡

在縣西南三十里周八十丈

陳胡堡

在縣南二十里周二百四十丈

東郝堡

在縣東南十里周一百十丈

楊盤堡

在縣西北十五里周一百二十丈

甌井堡

在縣西北二十里周七十丈

以上懷仁等十一堡俱築於明嘉靖年今並廢

麓臺寨

即漢北臺

楊壁寨

中平四面深溝

訓谷寨

三寨即今麓臺楊壁訓谷三村地也三村地

勢峻險四面皆溝惟通曲徑爲避兵之所故以寨名
明嘉靖辛丑北寇之變人投麓臺村寨以免難者至

眾云

東北二十里形隱天成

谷頭寨

在縣北十五里地險如麓臺諸寨亦可避兵

易曰王公設險傳曰勇夫重閉是以歐陽修新唐

書地里志雖一鎮一戍悉記於其州之下蓋表前

人之經略制置欲後世考其跡而因得以修其備

其意深哉褚志所載諸堡大抵皆築於嘉靖中北

虜入寇時今廢毀者實多雖有所存非殘缺不完
即狹小難容夫方平居無事人莫不厭勞苦而憚
興役一旦倉卒倣擾又未嘗不願得所保聚以免
於禍患至事定而安樂如故玩愒復乘所以勤苦
築於先時者往往圯壞於其後然雖無事而向之
所恃爲固而艱難入保者尤不可忘况堡寨所存
又足壯城郭之勢而資外衛哉則綢繆未雨以備
不虞是在勤事者耳

榆次縣志卷之二

公署

公所坊表

舍宇都里附

倉庾

縣治爲宋并州守署之遺在城中央少西南大門三楹榜曰榆次縣又榜其楣曰晉藩首輔前明晉王封國太原以縣擬三輔故云至今仍焉門內東南爲思鳳樓相傳潞公所築上列鐘鼓以司晨昏明祭酒閣樸有記舊在儀門內國初移此下爲賓賓館今改役舍迤北爲稅課亭爲土地祠後移祠於西改建關帝廟土地祠後爲獄祠左右爲役舍迤東轉北爲儀門榜曰古并州治內建

聖諭牌坊

坊旁列六曹正北爲大堂榜曰牧愛東西爲庫再東

爲鄧侯祠堂後左爲永益庫右爲聽事舍中爲宅門

門內有古槐二株東爲門房西爲花亭院內廳三楹

知縣會客於此二堂舊榜爲思補今日懸鑑涵冰又

內爲三堂榜曰思鳳今爲優學內爲四堂知縣寢室

在焉最後廳九楹甚宏敞今止存三楹優學堂西偏

舊有槐月軒冰雪堂半憩亭後俱傾今爲幕友舍東

列屋數間爲庖廚牆東隙地數畝有高阜可以眺遠

蓋司爨者聚煤土其間積久成邱不復知歲月矣北

爲馬廐中有馬王廟三楹廟旁有井知縣鄒雙建倉

於其南又東爲舊倉乾隆四年知縣劉濤以公署多
敞自內宅至大門畢修之其後宅門內屢有補葺惟
大堂與

聖諭牌坊儀門大門數處知縣張映南於道光二十四年重
新今尚壯麗可觀

典史宅舊當思鳳樓之東東三曹舍外今在縣儀門外
靶總宅 在富戶街

外委宅 在東門街

縣丞宅舊當恩補堂之東東庫舍外明崇禎中丞汰宅
亦廢今爲永益庫

主簿室舊當思補堂之西西庫舍外 國朝順治初簿

汰宅亦廢

故察院公署 在縣治東明崇禎十五年夏災於火

國朝康熙二十七年知縣劉星以其址建兩賢祠

故察院分司署 在城隍廟東 國朝乾隆十三年即

其址建義倉

公所舍宇倉庾

射圃亭 在儒學西明正德三年知縣蘇民建南北長

四十四丈東西廣六丈六尺中築臺基圍九丈上建

正亭三楹

今惟址存

演武廳舊在縣城西南隅明嘉靖二十一年知縣辛樂
市地改置於城西門外外爲轅門中間爲官道北首
臺階上建廳三楹廳東西耳房各一間其南爲照壁
後俱頽惟正廳屢加修葺至 國朝道光二十年知
縣張映南重修其臺址南北長五丈五尺東西廣六
丈二尺官道東留地二十畝道西留地二十四畝
鳴謙驛館 在鳴謙驛堡內洪武三年設錢志載惟驛
丞宅存今址基無考

預備倉即今常平倉明初置在城外永樂三年知縣曹
永中移縣治東建屋三十餘楹成化嘉靖間知縣梁

琮尹倫俞鸞相繼修舊有官亭三楹 國朝雍正四年知縣張孫紘以其屋爲社倉

社倉凡五處一在城中常平倉內一在長甯鎮一在東陽鎮一在龍白村一在鳴謙鎮俱 國朝雍正四年知縣張孫紘奉文立褚志載明時榆次社倉有四皆隆慶中知縣王應辰所立在鄉者三鳴謙東陽什貼在城者一則順城街者是也惟鳴謙社倉即舊址所建餘並廢

義倉城鄉凡六處本城義倉在城隍廟東故按察分司舊址內 國朝乾隆十三年邑紳郝仁貴建屋三楹

其四鄉義倉一在鳴謙即借社倉儲之一在張慶一
在北田一在八達村一在上黃彩村俱借廟宇存儲
並未建倉

惠民藥局今設立醫學者即其故所

陰陽醫學僧道四術舍在縣治大門東

冰窖 在東嶽廟內明萬曆間人遭瘟疫從溝崖下得

冰全活甚眾知縣趙昌運令民輸資修冰窖至今城
關十六鋪於隆冬時每鋪鑿冰二十五塊共儲冰四
百塊冰夫一名每年工食銀四兩

養濟院明洪武八年知縣張友政建在常樂寺西其址

南北長十三丈五尺東西北廣五丈五尺南廣六丈
內正屋五間東西房各四間嘉靖年及國朝乾隆
年重修後復屢次補葺

坊表附

縣治十三坊

宣化

善政

育賢

東民

咸甯

陽和

仙桂

時登

咸熙

普潤

德惠

市利

迎恩

今惟咸甯坊存在東門街

大司成坊

在縣治西爲祭酒閣樸立

開府中夏坊 在縣治西爲尚書褚鈇立

豸史坊 在縣治東爲贈御史褚大全立

三世尚書坊 在縣治東爲褚鈇與其祖父立

敕贈坊 在富戶街爲太僕寺丞周楫之父周益立

孝義坊 在城十鋪乾隆五年爲周昌運立

都里附

古十一鄉

梗陽鄉 在縣西南隋初析爲清源地

龍門鄉 在縣北爲王胡爲聶村爲左付爲羅家莊

來暮鄉 在縣東爲源渦爲中郝爲李方爲訓峪

思鳳鄉

在縣東爲榆城爲東祠爲麓臺爲蘭交

三教鄉

在縣東南爲雙村爲福堂爲張胡爲慶城

三徒鄉

在縣南爲南要爲王村爲榮村

聖厯鄉

在縣西南爲懷仁爲修文爲東白爲褚村爲陽安爲聖許

西管鄉

在縣南爲車輶爲開白爲南莊

開元鄉

在縣西南爲胡喬爲永康

使相鄉

在縣西北爲使趙爲使張爲郝莊爲東賈

鳴謙鄉

在縣西北爲秋村爲鳴李爲王杜爲甄井

今七十都

在城一都

甄井都

羅家莊都

東祠一都

康祁二都

寺峪都

中棧都

○ 在城二都

龍白都

獲村都

榆城都

楊盤都

蘇家莊都

源渦都

○ 在城三都

什貼一都

什貼二都

修文都

福堂二都

福堂三都

杜堡都

○ 在城四都

王胡一都

王胡二都

麓臺都

中郝都

見子都

○ 在城五都

上戈都

東白一都

東白二都

中郝二都

龍田都

○ 在城六都

車輞都

李方都

左付都

秋村都 訓峪^谷一都 訓峪^谷二都

○南関一都 德音都 洞白一都 要村都

洞白三都 張明二都 張明三都 聖許一都

聖許二都

○南関二都 慶城都 楊壁都 南莊都

使張都 張慶都 使趙都

○南関三都 永康一都 郝莊都 西榮都

東趙都 懷仁一都 懷仁二都

○南関四都 永康三都 胡喬一都 胡喬二都

東賈都 鳴謙都 東陽都

城關十六鋪

在城一鋪

在縣治西北

在城二鋪

在縣治西北

在城三鋪

在縣治北一名新集街

在城四鋪

在縣治西

在城五鋪

在縣治西南

在城六鋪

在縣治東南

大東關鋪

在東門外

在城八鋪

在縣治東

在城九鋪

在縣治東北

在城十鋪

當城中央縣治在焉

南關一鋪

在關城北

南關二鋪

在關城西

南關三鋪

在關城東

南關四鋪

在關城南

南關五鋪

在關城東南

小東關鋪

在關城小東門外

四路共八鎮二百一十九村

東北路村莊距縣里數

三六村

王胡鎮 十里

南溝村 八里

東西付村 十五里

郝家溝 寨上二村附

葛家莊 十八里

羅家莊 二十里

南要店 三十里

北要店 三十里

喬頭村 三十五里

李方村 四十里

東寨裏附

柏林頭 四十里

王家莊附

新置村 四十里

十里溝附

莊立村 五十里東北接

壽陽縣界

什貼鎮 四十五里

魏家北頭 南窰頭二村附

南塢坪 四十五里

韓家寨 四十五里

楊家莊 四十五里

焦家寨 四十五里

小焦村 南北嘴二村附

小寨村 三十五里

龍白村 三十里

白家坡附

峪頭村 二十里

流村 二十里

聶店村 十五里

南胡村 十五里

北胡村 十五里

蘇村 二十五里

墳上附

神堂溝 三十里

沛霖村 三十里

東莊裏 田家莊 田家灣三村附

左付村 四十里 杜家山 鄭家莊二村附

高壁村 四十五里 蘇河裏附

後溝村 四十里

蒜峪村 五十里北接 王家腦 馬家腦二村附

站道村 五十里 齊家山 店上二村附

張家河 五十里東北接 壽陽縣界

蔡家嘴 冀家山 中嘴裏三村附

柳溝村 五十里北接壽陽縣界

溝北莊 圈子裏 后柳溝三村附

孟家井 六十里西接陽曲縣界西南接太原縣界

楊卷子附

平地泉 四十里

小西溝 裴家圪臺 張家圪臺三村附

東南路村莊 距縣里數

源渦鎮 五里 北合流村 十五里

南合流村 十二里 菜豆灣附

峪壁村 二十里 南沙溝村 二十里

八石村 二十五里

西長甯 二十八里

東長甯 三十里

相立村 二十八里

南蘭交 四十里

北蘭交 四十里

白石村 四十里

石槽頭 廟星上 莊窩村 南楊家莊

故莊村 懷元村 白家莊 言家峪八村附

承恩村 五十五里

上莊村 中莊村 下莊村 侯峪村 姚家背

圪落峪六村附

仁鳥溝口村 六十五里

猫兒嶺 龍科莊二村附

慶城村 八十里

杏林塢莊 石拐莊 葦子溝三村附

霍城村 九十里

石片莊 段家腦 后溝莊 桃花塢

東南接和順縣界

四村附

東郝村 五里

楊家嶺附

中郝村 五里

西郝村 五里

井峪村 十五里

郝都村 二十里

南趙村 十五里

北趙村 十五里

莊子村 二十里

季麻村 二十二里

紫坑村 二十五里

榆城坪 二十里

麓臺村 三十里

劉家坡附

山頭馬欄村 三十里

南喬頭 三十里

楊壁村 三十五里

下黃彩村 三十八里

上黃彩村 四十三里

張坪村 四十五里

西窰村 五十里

段和里 東赤土村 蓮子腦三村附

白田村 六十里南接太谷縣界

南頭村附

紫中坪 五十里

麻地溝 五十三里

伽東窰上村 金金寨二村附

西塢村 十里

安樂村 十里舊名東塢

楊梁村 十五里

西塢溝附

南張村 十五里

藥村 十八里

牛村 二十里

楊方村 二十里

西祁村 二十五里

東祁村 三十里

義井村附

杜堡村 二十五里

大伽南 二十五里

福堂村 三十里

許曲村 三十五里

伽西村 四十里

重源村 四十里

北流村 三十五里

小南莊 四十里

南流村 四十五里

朱村 五十里

施家橋

西河莊

三朱溝

南接太谷縣

三村附

東田村 二十里

上渦村 二十二里

下渦村 二十五里

大溝村附

見子村 三十五里

龍頭坪

小河溝

田家北頭

灰嘴村

閻家坪五村附

高坪村

五十里東北接
壽陽縣界

張家莊

七十里

白坡頭村

八十里東接
和順縣界

高家山

七十里

蘇家莊

十五里

山莊頭

二十五里

尚村

十三里

李塢村

十五里

東郭村

二十里

東趙村

二十五里

小壁村

三十里

西趙村

三十里

下峪村

三十五里

賈上村

東山村二村附

訓峪村

三十里

北山上附

後溝村

三十五里

牛蹠灣附

關子頭 四十里東接
壽陽縣界

西北路村莊距縣里數

郭家堡 四里

榮村 八里

北谷附

寇村 十里

郝莊村 十二里

甯家營 十五里

東賈村 二十里西接
太原縣界

大張義 二十里南接
太原縣界

小張義 二十里

高村 十里

韓村 十里

小趙村 十二里

六堡村 十五里

西榮村 二十里西接
太原縣界

上營村 十五里

小營 東營二村附

黑馬營村 十六里

王家堡村 十五里

窰上村 三里

使趙村 十里

侯方村 十一里

使張村 十二里

鳴李村 十五里

侯村附

楊盤村 二十里西北接
太原縣界

秋村 二十里

甄井村 三十里西北接
太原縣界

西溝裏 四十里
河口 二十七里
二村附

王杜村 二十里

倉上附

岡頭村 三十里西北接
太原縣界

邢家堡 墳上 西窰子 山草窰 五龍溝五

村附

安窰村

五里

龍田村

十里

東轟村

十里

西轟村

十里

鳴謙鎮

二十里

志村

小南莊

李家坡

澗河上四村附

中杜村

三十里俗名東西沙溝村

河底村

三十里

小峪口

二十五里

胡家灣

三十里

大峪口

三十里

鞋底嶺

三十里

青石窰二十二村

趙家坡 三十里

後坡莊 三十三里

施家窰 三十三里

陳家窰 三十三里

賈家窰 三十五里

沙坪裏 三十六里

黃土坡 四十里

老黃溝 四十二里

劉家窰 四十二里

小西溝 四十四里

天窰上 四十四里

西灣子 四十五里

東灣子 四十五里

十字裏 四十六里

小東溝 四十七里

陰厓子 四十九里

隔梨石 五十里

正溝上 四十九里

楊家莊 四十八里

杏樹坡 四十七里

臺盤溝 四十五里

尹家坡 四十六里

西南路村莊距縣里數

共計

近城村 五里

張超村 十里

楊村 十三里

南谷村 十三里

張慶村 二十里

永康鎮 三十里

西河堡 二十五里西接太原縣界

郝村 三十五里西北接太原縣界西南接徐溝縣界

王村 十里

偃武村 十四里

懷仁鎮 十五里

西長壽村 十五里

王郝村 十八里

馬村 二十里

弓村 二十五里

陳胡村 三十里

述巴村 三十里

北胡喬 三十里

西胡喬 三十里

胡喬營 三十里

遠村 三十里

要村 三十里

開白村 三十一里

北席村 三十五里西接徐溝縣界

車輞村 三十五里

南莊 四十里西北接徐溝縣界西南接太谷縣界

西范村 四十里西南接太谷縣界

龐志村 三十五里

德音村 三十二里

東陽鎮 三十里西南接太谷縣界

西陽村 三十里

王都村 二十五里

褚村 二十里

西白村 二十里

內白村 二十里

陳侃村 二十里

王香村 二十五里

聖許村 三十里

魏岳村 三十里

郭訓村附

上下丁里村 三十五里

豈家莊附

彭村 三十里

郭村 五里

北要村 十里

南要村 十里

修交村 十五里

東長壽村 十五里

東西雙村 十五里

小莊立村附

南莊立村 十五里

小伽南村 十五里

南小趙村 二十里

北田鎮 二十里

南田村附

張胡村

二十五里西南
接太谷縣界

鞏村

二十五里南
接太谷縣界